

Coengh Sietdiuz Swiqndang

上林县大丰镇中心学校四年级 Moz Sinhyiz/莫欣怡

Bihaenx seizndat, gou ndaej haj bi, mbwn gig hwngq, hwngq ndaej duzgaeq fwed roemj roengz-daeuj youq, duzma iet linx, duz-bid gwnz faex heuhsaengzsaengz. Hwngq baenz gou hanh dumz gyauej caez, naengh youq gwnz mbinj bak dou langhliengz, lij dwg hanh lae hanh conh. Sawqmwh gou naemj daengz ndaw binghsiengh lij miz di sietdiuz he. Gou fwt buet haeuj ranz bae, hai binghsiengh, aeu gaiq sietdiuz ndeu okdaeuj, sik hai gij daehrog, haenqrengz haeb gaemz hung ndeu. A! Sangj! Gou youh haeb gaemz ndeu, caen dwg sangj dangqmaz! Gou yawj diuz sietdiuz heiq hwnjfoedfoed, couh gag naemj:

Gou raen ndat baenzneix lo, sietdiuz engq ndat ba? Mbouj ne, de vihmaz hwnj fwi foedfoed ne? Gou wnggai coengh de swiq ndang ba?

Gangj guh couh guh, gou riu bat raemxmboq ndeu daeuj, coq sietdiuz roengz raemx bae, ndaeng-gon dangqmaz gangj: "Sietdiuz, gou mbouj gwn mwngz lo, mwngz menh-men swiqndang gonq! Gou bae guhcaemz gonq." Gangj sat, gou couh diuqykyek buet okbae guh-caemz lo. Hoeng, gou dauqma seiz, sietdiuz mbouj raen lo, cij raen diuzfaex fouz youq gwnz raemx. Yi, sietdiuz ne? Gou iet fwnz haeuj ndaw raemx bae gyaux hwnj gyaux roengz, cungj ra mbouj

raen sietdiuz, caen dwg geizheih lai lo.

Seizhaenx daxmeh cingq ngamj roengzban ma daengz ranz, yawjraen aen yienghcej gou geizheih lai, couh cam: "Mwngz baenz-lawz lo? Sinhsinh." Gou danq gaemz heiq ndeu, dawz gienh saeh neix lwnh daxmeh nyi, daxmeh dingq le, riuahaha, naeuz: "Mwngz caen huk a, mwngz mbouj rox sietdiuz cuengq haeuj ndaw raemx bae couh yungz ha?" O! Dwg yienghneix a, gou fwt singj gvaqdaeuj lo.

Haha, mwngz yawj gou iq seiz ngawz lai lai lo!

(lauxsae son'gyauq: Vangz Gveiyangh/黄桂香)



Lauxsae Aemq Gou Roengz Laeuz

Bohmeh aemq gou ne cingq-ciengz lai, hoeng geij ngoenz gonq banhcujyin daj ndaw gyausiz aemq gou roengz laeuz, neix caen dwg baez daih'it lo, gou raen ndawsim raeurub dangqmaz.

Geij ngoenz gonq, miz ngoenz ndeu banringzgvaq cuengqhag le gou byaij laelauez mbouj re couh caij hoengq lo, din deng sieng bae, liuxle geij ngoenz neix cungj dwg daxboh aemq gou hwnj laeuz roengz laeuz.

Miz ngoenz ndeu, banringzgvaq cuengqhag le, daxboh cieq gou mbouj gibseiz, gou simvueng baenz yaek daej bae. Neix boux Cinz lauxsae biz-bwdbwd ne raen gou yienghneix le, cou nai gou naeuz: "Mwngz roengz laeuz mbouj ndaej, gou aemq mwngz roengzbae ba." Gou sim ngeix: Gou baenzlawz hawj lauxsae aemq gou roengz laeuz ne? Vanzlij ne boux lauxsae neix biz baenzneix, moix baez hwnjroengz laelauez de cungj heiq conhfofo bae, aemq gou roengz laeuz de dingj ndaej rox mbouj? Gou lij ngeix sam ngeix sei, boux lauxsae neix mbouj gangj gijmaz, soh aemq gou hwnjdaeuj, byaij ok gyausiz bae.

Gou doeksaetyat, ndang bomq youq aenlaeng lauxsae nanoek, gyauej bomq coq gwnz mbaq gvangqget haenx, lumjnaeuz hoemj ninz youq gwn sahfaez

unqnemq ndaw ranz. Gou simgaenj lai couh mbouj gamj hai da yawj, ndawsim ngeix: Gyoengq doengzhag haengdingh cungj yawj gou. Caen dahraix, lauxsae aemq gou roengz laeuz mboengq haenx, miz mbaeng doengzhag daengx din yawjgonz, ndaejnyi mizdi doengzhag dahaenz naeuz ndaej lauxsae aemq ndei lailai, gou nyi le couh raen youh najmong youh vuenyungz.

Mboengq roengzlaeuz nanz lailai, duenh roen song sam faencung couh byaij liux haenx lumj deng byaij diemj cung ndeu bae, aemq gou daengz bakdou hagdangz le, lauxsae cuengq gou roengz, mizdi heiqconh naeuz: "Baezlaeng miz gihvei, gou lij aemq mwngz roengz laeuz, neix gou hix ndaej gemjbiz." De gangj vahdwgriu, lumj rumzcin ci naj nei, gou gikdoengh lai gangj mbouj ok vah lo.

Daxboh youq bakdou hagdangz, cieq dawz gou, gou ngeng ndang yaek gyo'mbaiq lauxsae, hoeng lauxsae gaeng dauqbae lo.

Aen ciengzmienh lauxsae aemq gou roengz laeuz neix hawj vunz yawjraen le sim raeurub dangqmaz, gou raen din gou fukdauq lai vaiq raeuh bae. Gyo'mbaiq mwngz hawj gij ndiepgyaez raeurub hawj gou.

(Mij Vwnzyingz)

Soengq Dahcej Bae Hagdangz

2018 nienz 8 nyied 26 hauh, haetromh haj diemj buenq ranz dou caez hwnq lo, aenvih dou miz gienh hongsaeh ndeu youqgaenj dangqmaz—soengq dahcej bae Nanzyangz doegsaw.

Dou comz ndei doenghyiengh le, gaengq daengz roek diemj lo, daxboh coi dou hwnj ci. Daihgaiq gvaq diemj cung ndeu, dou daengz Nanzyangz Si Daihngaih Cunghyoz. Ranz dou seiq boux ciuq dajsuenq faenhong, dawz le doenghyiengh byaij haeuj dou hagdangz. Ndaw hagdangz vunz cien vunz fanh, lumj aen hawciengz hung ndeu.

Dou aemq daeh daeuj daengz baihnaj mbaw "buengj faen ban". Mbaw "buengj faen ban" henjgim haenx daj doenghlaeuz baihbaek daz daengz laeuz baihnanz, lumj rangh raemxgienghdat nei. Dahcej daiq daxboh daxmeh, youq gwnz buengj ra mingzcoh de. Gou ndwn youq baihlaeng gyoengqde yawj doenghyiengh, gag simgip ndwi, hai mbouj ndaej goengrengz. Hawj gou yawj! Gou hawj daxmeh

yawj doenghyiengh, gag buet gvaqbae, lwgda lumj daengdamqra dwk ra bae ra dauq. Daengzlaeng, "Hingz Bungzyij" sam cih saw neix deng gou ra raen lo, aen mingzcoh dahcej yienhda dangqmaz.

Cieplaeng, daxboh caeuj dahcej buen saw bae gyausiz baudau, daxmeh bae ranzsuzse hagseng mehmbwk ra mbonq, gou youq laj laeuz yawj doenghyiengh. Cungj raen daj bakdou ranzsuzse daengz roenhwnjlaeuz, daj roenhwnjlaeuz daengz gwnz cauhsangz, miz haujlai vunz dawz doxgaiq, mizdi aemq aeu, mizdi gwed aeu, mizdi umj aeu, mizdi riuj aeu, bouxboux hanh deklinlin, heiq conhfofo.

Daengz seiz dou cang ndei aen mbonq dahcej liuxle, gaengq dwg banhaet cib'it diemj lo.

Yawj daxboh daxmeh baegfefe nei, gou nyinh mbouj ndaej danqheiq: "Aen sim bohme h lajmbwn inhoj!"

(Hingz Vansinh)

